

■ REZIA VETERANA

Empernaivel inscunter en la chapitala

(anr/gc) Da la radunanza generala da la Rezia veterana – ella cumpiglia ils anteriurs commembers da la Corporaziun academica a Friburg – da quest onn a Cuira han enturn 30 personas prendi part venderdi. Introducì è vegnì cun ina visita guidada al bajetg dal tribunal chantunal nua che *Leza Dosch* ha declerà il ritg decor d'art en quel edifizii.

La radunanza è sa splegada en la Staila sut il presidi da la zunt premurada presidenta *Barbla Etter*. En sia revista annuala ha ella allegà il pelegrinadi da l'onn passà si Ziteil cun avat *Vigeli Monn* sco celebrant e predicatur. Tar la Festa centrala da la Societad da students svizzers (SSS) a Murten èn dus commembers daventads veterans: *Stefan Capeder* e *Giusep Nay*. *Claudia Lutz* è stada là en il comité d'organisaziun.

En gronda pietad èn ins sa regurdà dals commembers defuncts: Arno Liesch, stà emprim president da la Rezia veterana, e d'avat Pancraz Winiker, filister d'onur, ch'è stà blers onns manader spiritual dals pelegrinadis si Ziteil.

En la Rezia veterana è ina nova commembra vegnida recepida. Deplorabel è stà che na main che 13 commembers han stuì vegnir exclus pervia da na avair pajà dus onns in suenter l'auter la contribuziun annuala. La Rezia activa a Friburg ha da preschent quatter commembers e dus candidats.

Sco presidenta è Barbla Etter, che doce-scha da preschent rumantsch a Friburg fin ch'il nov professor entschaiva l'avust, vegnida reelegida. Sa retratga è la cassiera *Petra Fetz*. Successura è daventada *Gianna Halter*. Il protocol redegia vinavant *Annina Maissen* e *Daniel Simonet* resta assessor. Na

pussaivel èsi stà da remplazzar il suprastant demissionant *Remo Cabenzli*.

D'in bun quint cun in surpli d'entradas da 1900 francs ha il revisur *Gaudenz Schwitter* pudì rapportar, uschia che la facultad munta a prest 17 000 francs. Era el è vegnì confermà e da nov elegida Petra Fetz che remplazza *Lukas Meyerhans* ch'era sa retratg.

En il decurs dal matg ha lieu in di da sentupada per famiglias a Ragaz-Bogn. Ils 9 d'avust pelegrinescha l'uniun per la 20. giada si Ziteil. A la fin d'avust è la Festa centrala da la SSS a Sarnen. Per l'october è previs ina festa da vin en il Signuradi grischun. Suenter la radunanza ha la Rezia veterana passentà ina bella saira da cumpagnia tar ina buna tschaina.